

ERA CRASTA

Numerò 47 · gèr-herèuèr 2006

Impresi sense adreça

Aprobacion des pressupòsti municipaus

Eth Plen der Ajuntament de Vielha e Mijaran celebrat eth passat dia 22 de deseme de 2005 aprovèc iniciaument es pressupòsti municipaus entar an 2006, es quaus an estat expausadi ath public, e sense auer-i

auut cap d'allegacion demoren aprovadi definitivament. Eth resum per capítols e per cadun des corresponenti organismes e empreses que l'intègren, ei eth que seguís.

PRESSUPÒST D'INGRÈSSI

Cap.	Denominacion	Pressupòst dera Entitat
1	Impòsti dirèctes	1.862.814,03 €
2	Impòsti indirèctes	275.001,00 €
3	Taxes e d'auti ingrèssi	637.098,00 €
4	Transferéncies correntes	973.769,94 €
5	Ingrèssi patrimonius	101.400,12 €
6	Alienacion d'invers. reaus	0,00 €
7	Transferéncies de capitau	461.859,19 €
8	Actius financèrs	0,00 €
9	Passius financèrs	311.991,16 €
TOTAU INGRÈSSI		4.623.933,44 €

PRESSUPÒST DE DESPENES

Cap.	Denominacion	Pressupòst dera Entitat
1	Despenes de personau	1.527.866,46 €
2	Despenes de bens e servicis corrents	1.565.946,48 €
3	Despena financèra	125.560,67 €
4	Transferéncies correntes	440.153,53 €
6	Inversions reaus	823.395,65 €
7	Transferéncies de capitau	0,00 €
8	Actius financèrs	0,00 €
9	Passius financèrs	141.010,65 €
TOTAU DESPENES		4.623.933,44 €

SUMARI

1

Aprobacion des pressupòsti municipaus

Aprobacion iníciau dera ordenança reguladora de subvencions.

Concession administrativa entara espleita deth parcatge dera Plaça dera Generalitat.

2

Aprobacion iníciau des modificacions de diuèrses normes subsidiàries e complementàries de planejament dera Val d'Aran.

Adjudicacion des viuendes de proteccion oficial de loguèr en Vielha.

Enquèsta de seguretat publica de Catalonha.

3

Presentacion deth projècte Tuca.

Es Reis d'Orient arriben en Municipi de Vielha e Mijaran

AGENDA D'ACTIVITATS

4

Campionat de Catalonha de patinatge artistic

Teatre en Vielha

Exposicion de pintures de Francesca Plasa

Aprobacion iníciau dera ordenança reguladora de subvencions.

En Plen celebrat eth dia 22 de deseme de 2005, s'aprovèc iniciaument era ordenança reguladora de subvencions, era quau auràn d'auer-la en compde totes aqueres associacions, clubs, entitats etc. que volguen demanar ua subvencion ar Ajuntament de Vielha-Mijaran. Aquesta ordenança se trape en periòde

d'exposicion publica, e en cas de non auer-i cap d'allegacion o reclamacion, aguest acòrd s'entererà definitivament.

Entà toti aqueri as qui pogue interessar eth contengut d'aguesta naua ordenança, poderatz consultar-la ben en burèu der Ajuntament o ben ena sua pagina web: www.vielha-mijaran.org

Concession administrativa entara espleita deth parcatge dera Plaça dera Generalitat.

Er actuau titular dera concession entara espleita deth parcatge sosterranh dera Plaça dera Generalitat de Vielha ei Vielhapark s.l.

Recentament s'a presentat en aguest Ajuntament, ua sollicitud dera empresa ANAPEOO,S.L. interessada ena espleita d'aguest parcatge.

Per tant ena session deth Plen deth 12 de deseme de 2005, s'aprovèc era autorizacion ara empresa Vielhapark S.L. ara cession a ANAPEOO,S.L., dera concession administrativa entara espleita de 101 places deth nomenat parcatge.

Aprobacion iniciau des modificacions de diuèrses normes subsidiàries e complementàries de planejament dera Val d'Aran.

MODIFICACION DERA NORMA Num. 51.

Er objècte d'aguesta modificacion ei era de recuperar er objectiu principau der article 148 des NNSS, non arthenhut damb es plans derivats tramitadi en cò que tanh ara ampliacion e ar isolament deth còs dera glèisa de Sant Miquèu de Vielha, definicion d'un itinerari entath cementèri e flexibilizacion dera comunicacion dera zòna.

Per un aute costat, damb aquesta modificacion taèben se preten arthenher de definir un sistèma de comunicacion coerent, que ligue era trama urbana der entorn (UA 4 e 5, Avenguda Pas d'Arró e casc antic), jerarquizar aquest sistèma arthenhent aliberar ua part deth trafec rodat deth centre istoric e crear atau ua zòna importanta sonque entà passants.

MODIFICACION DERA NORMA Num. 53.

Er àmbit d'aguesta modificacion ei era U.A. 5 de Vielha, e concrètament es parçèlles afectades son era A,G e F2 dera reparcellacion dera U.A. 5.

Er objècte ei era modificacion puntuau der article 94 des actuaus normes, e concrètament eth sòn darrèr apartat, en qué se regulen es separacions minimas en toti es limits dera parçèlla, que demorà coma següis:

"Art. 94 (18.01.1989) Condicions d'edificacion En àmbit des parçèlles qu'intègren era Unitat d'Actuacion 5 de Vielha e era sua reparcellacion, era nautada des edificacions aurà d'auer planta baisha, ua planta e humarau, permetent-se ua ocupacion maxima deth 60% dera parçèlla e ues separacions minimas en toti es limits de parçèlla de 3 mètres, exceptat des façades deth carrèr Pieda e eth sòn parallèl en extrem oposat dera isla, que poderàn variar, en foncion des besonhs dera propietat, entre 0 mètres d'alinhament ath viau, e 3 mètres coma maxim. Eth rèste des paramètres dera zòna demoren inalterables.



MODIFICACION DERA NORMA Num. 54

Er àmbit d'aguest modificacion afècte exclusivament ara zòna entre pònts dera Av. Garona de Vielha.

Er objècte d'aguesta modificacion ei definir es paramètres basics deth solèr classificat d'urban e qualificat de profitament privat ena modificacion puntuau num 1 des NSCP, damb era finalitat de poder desvolopar aquest solèr, ja qu'en dita modificacion num. 1 der an 1985, non se definic en cap de moment eth tipe d'ordenacion damb eth quau calie bastir en aquesta zòna, non demorèren regulats es paramètres basics dera edificacion.

Des der an 1985 s'an autorizat licéncias, utilitzant es paramètres dera Clau 3c des Normes Subsidiàries dera Val d'Aran. Coma encara demorèren parçèlles entà bastir, se contunharà aplicant era Clau 3c, e per tant es paramètres basics entà desvolopar aquest solèr se regiran pes articles 98, 99, 100 e 102 dera normativa.

Adjudicacion des viuendes de proteccion oficiau de loguèr en Vielha.

Eth dimars dia 13 de deseme, s'adjudiquèren es viuendes de proteccion oficiau de loguèr, plaçades en Solan de Vielha.

Cau rebrembar que ja s'auie hèt ua prumèra adjudicacion d'aguesti pisi, mès coma que ne demorèren de uedi, se dauric un nau plaç de sollicitud des madeishi.

En aquesta ocasion an estat 6 es pisi adjudicadi entot demorar-ne nauament un de uet.



Enquèsta de seguretat publica de Catalonha.

A compdar deth mes de gèr, eth Departament d'Interior dera Generalitat de Catalonha, començarà a realizar es trabalhs corresponenti ara VIIIau. Enquèsta de Seguretat Publica de Catalonha.

Aguesta enquèsta consistís en estudi periodic des experiéncias de victimizacion que s'an produsit en Catalonha, era mesura des sentiments d'inseguretat e era arremassada des opinions des ciutadans en matèria de seguretat e policia.

En aquesta ocasion, a compdar deth mès de gèr e enquiath mès de març, se haràn lèu 15.000 entrevistes telefoniques, des quaus grana part, pòden hèr-les as vesins d'aguest municipi.

Per aquest motiu, e entà que quinsevolh persona qu'age dobtes o ben volgue auer mès informacion e confirmar que se tracte d'ua enquèsta oficiau e qu'es donades se mantieràn ena mès absoluta resèrva, podetz trucar tath telefon d'atencion ath ciutadan dera Generalitat de Catalonha 012.

Presentacion deth projècte Tuca.

Eth 28 de deseme de 2005, se presentèc en Ajuntament as membres deth Plen e as Presidents des EMD de Betren e d'Escunhau e Casarilh, eth projècte dera empresa TUCARAN RESORT S.L., tanhent ara redubertura dera estacion d'esquí dera Tuca, que permete crear ua estacion dubèrta e viuia pendent tot er an, aufrint era possibilitat de practicar ath delà der esquí d'auces activitats. TUCARAN RESORT contemple un espaci de lèu 11 ectares de superfície.

Entà integrar-se pleament en paisatge, aquest projècte contemple zònes verdes e de comunicacion, atau coma places de parcatge tant entà coches coma entà autobusi.

Eth Plan Director d'Era Tuca, plantege ua estacion de tamanh miei damb ua capacitat ena sua prumèra fasa de 2.500 esquaires per dia, podent arribar a auer-ne 6.000 ena sua quatau fasa d'execucion.

Damb un domeni esquiable de 425 ectares, ena sua fasa finau dispausará d'11 remontadors, 33 pistes aupines (8 des quaus auràn nhèu artificiau), dus circuits d'equi nordic damb ua longada de 35 Km, completant era aufèrta damb un Snowpark dam ua superfície de 3,5 ectares.

Eth projècte contemple eth bastiment d'un rocodròm, un centre d'ípica, un circuit de BTT, senderisme, trekking, atau coma Aules de Natura, Campament Temanits infantils e juvenils, bastiment d'un centre de formacion universitària especializat en espòrts, miei ambient, torisme e temps de lèser atau coma organizar seminaris, etc.

Tanhent as accèsi e parcatges ath pè des pistes en Betren, s'abilitaràn 1.700 places entà coches e 23 entà autobusi. Des places entà coches, 1.200 seràn soterranhes.

Es Reis d'Orient arriben en Municipi de Vielha e Mijaran

Eth dia 5 de heruèr arribèren es Reis d'Orient en Ajuntament de Vielha e Mijaran, cargadi de presents entà toti es mainatges e mainades deth municipi, e coma non tanben entàs mès grani. Tanlèu arribèren anèren entara residència Sant Antòni de Vielha, entà portar-les una camèra de fotografies digitau damb era que poderàn auer un rebrembe de toti es actes e hèstes que hèsqen. Dempús anèren entà Gausac a on les demorauen fòrça mainatges que voleren saludar-les e parlar damb eri.

A contunhacion baishèren damb es sues carròsses enquiar Ajuntament de Vielha a on les demoraue er Alcalde e era Corporacion Municipau entà receber-les e aconpanhar-les enquith balcon der Ajuntament, des d'a on eth Rei Melchor mos hec eth sòn descurs.

Ara seguida anèren enquith cine de Vielha a on repartiren un present entà toti es mainatges e mainades que voleren anar-les a veir.

E ath ser repartiren es presents pes cases des mainatges. Des d'ací, er Ajuntament de Vielha e Mijaran, vò dar es gràcies tant as reis coma as sòns patges, que cada an venguen entath nòste municipi tan cargadi de presents entà toti. Tanben volem arregraïr era collaboracion des Pompièrs d'Aran, des Mossos d'Esquadra e de toti aqueri que des der anonimat e que damb era sua collaboracion e participacion, hènt possible que cada an es Reis d'Orient poguen arribar enes nòstes cases.



Fòto Residència Sant Antòni



Fòto Ruiz

AGENDA D'ACTIVITATS

CELEBRACION DERA HÈSTA DE MAGRÀS

MAGRÀS EN CEIP GARONA DE VIELHA

Eth diuendres dia 24 de hereuèr, es alumnes deth CEIP Garona de Vielha, celebraràn era Hèsta de Magràs damb eth programa que seguís.

10,00 or.- Gessuda dera desfilada des dus estudis

10,15 or.- Amassada ena Plaça dera Glèisa de toti es escolans,

e desfilada pes carrèrs deth pòble.

11,00 or.- Crema deth pipòt ena Plaça dera Generalitat.

11,30 or.- Descors de Magràs per part des barbacassi e actuacion deth grop d'animacion "Era Garbèra" ena Sala polivalenta de Vielha.

CELEBRACION DETH MAGRÀS EN PALAI DE GÈU.

Tanben eth dia 24 de hereuèr e a compdar des 17,30 or. se celebrarà era Hèsta de Magràs en Palai de Gèu de Vielha. Era entrada ara pista de gèu, serà gratuïta entà toti aqueri que vagen disfressadi



SOPAR E BALH DE CARNAVAL

Er Ajuntament de Vielha e Mijaran, organitzarà eth dissabte dia 25 de hereuèr eth dejà tradicionau Sopar e balh de Carnaval, dubèrt a toti aqueri que i volguen participar, damb eth programa que seguís:

- 22,00 or.- Còctel de benvenguda
- 22,30 or.- Sopar bufet liure
- 23,30 or.- Session de balh, damb eth music Joan Inglada.

Serà en Hotèl Tuca de Betren e eth prètz deth sopar ei de 33,00€, e eth balh ei dubèrt a toti, tant se venguetz a sopar coma se non.

Era venda de tiquets serà ena Oficina de Torisme de Vielha deth 13 ath 23 de hereuèr. **Ei plan important comprar es tiquets per auança ja qu'es places son limitades e non se veneràn tiquets eth madeish dia.**

Cau remercar que non ei obligatòri vier disfressat.



Campionat de Catalonha de patinatge artistic

Pendent es dis 3,4 e 5 de març se celebràn en Palai de Gèu de Vielha es Campionats de Catalonha de patinatge artistic, damb era participacion des melhors patinaires catalans e des clubs convidadi de d'auti parçans.

Teatre en Vielha

A compdar deth mes de març, tornaràn a celebrar-se es serades de teatre "Teatre en Vielha".

Serà eth primèr dijaus des mesi de març, abriu e mai.

Es òbres que se representaràn seràn: "VENUTS", ua òbra que parle dera venda a domicili, damb sies actors e qu'en aguesti moments se represente en TREATRE NEU de Barcelona; "SÓLALA", interpretada per Cristina Medina, ei ua òbra plan variada que de ben segur mos harà passar ua agradabla estona, qu'artenhec ua plan bona critica en diari La Vanguardia. Eth darrèr espectacle ei pendent de confirmacion.

Coma ena sason pasada es entrades se veneràn per auança ena Oficina de Torisme de Vielha, e eth madeish dia, mès tanben i aurà era possibilitat de comprar abonaments entà totes es representacions.

Exposicion de pintures de Francesca Plasa

Deth 27 de gèr enquiath 19 de hereuèr, se presentarà ena Sala d'Exposicions der Ajuntament de Vielha e Mijaran, era òbra dera pintura Francesca Plasa.

Son dejà diuèrses es ocasions enes quaus auem podut gaudir dera òbra d'aguesta artista, neishuda en Barcelona en an 1921, diplomada en Magistèri e posteriorament ena "Escuela Superior de Bellas Artes de San Jorge".

Era sua òbra a recorrut part dera geografia espanhòla, mès tanben estrangèra. A exposat en Barcelona, Girona, Tarragona, València, Sevilha, Madrid, Màlaga, Lhèida, Portugal, Itàlia, França, etc.; mès es sòns quadres tanben forme part de colleccions privades d'Olanda, Belgica, EE.UU., Mexic, Argentina, Alemanha, Soïssa, e en Espanha, en Barcelona, Saragossa, Burgos, Bilbao, Tarragona, etc

Critics e escrivans an comentat era sua òbra, en tot dèder d'era causes coma:

"Se tracte d'ua pintura fòrta, intensa e dirècta. Paisatges que pòden amassar-se damb es des bòni impressionistes... Obres que pòden qualificar-se de mèstres"

José Cruset.

"Francesca Plasa ei, per veterania e dedicacion, ua des superviuentes artistes d'aqueth moviment catalan d'abantes dera guèrra e pòstguèrra que dessenhèc ua forma neoimpressionista sense renonciar as sues mès pròpleus arraitz, incorporant cò mès essenciau der expressionisme aleman, era sua escòla d'origen..."
Julian Sesmero.



D.L.: L-222-01

Dessenh: Alèxia Grustan. Val d'Aran 625 14 25 05